

SINGAPURA

10 individu kurang upaya ditaja tunaikan umrah

Anggaran Waktu Membaca: 3min



(Gambar: POS TKI)



(Gambar: POS TKI)

SINGAPURA: Kesemua jemaah umrah seramai 10 anggota **Persatuan Belia Bedok untuk Insan Kurang Upaya (BYSD)** selamat pulang ke tanah air siang tadi (24 Jan).

Kemudahan khas disediakan untuk rombongan istimewa ini, seperti penerbangan kelas bisnes dan van khas serta sukarelawan yang mengiringi mereka pada setiap masa.

LAWAN RASA 'ANXIETY', HARUNGI KESESAKAN DI TANAH SUCI

Antara perkara yang menakutkan jemaah umrah kali pertama yang kurang upaya intelek, Salamah Mohamed Ghazali Khan, 39 tahun adalah jika orang terlalu ramai dan saling tolak-menolak.

Namun, beliau dapat mengatasi perasaan itu dengan keprihatinan pegawai, mutawif dan sukarelawan yang mendampingi.

"Pengalaman yang tidak akan saya lupakan adalah di tempat yang suci ini, saya berjaya mengawal rasa 'anxiety' dan berasa tidak terlalu tertekan walaupun suasana sesak dan ketakutan saya terhadap orang yang tolak-menolak dan Alhamdulillah buat pertama kali dalam hidup saya, saya berjaya memanjat gunung. Kami diberi kesempatan untuk ziarah dan mendaki Jabal Nur! Di atas sokongan dari sukarelawan, saya berjaya mendaki sehingga ke puncaknya!"

Daripada 10 anggota rombongan khas ini, separuh merupakan golongan yang kurang sempurna penglihatan seperti Cik Fadhiah Aman yang bersyukur dapat menunaikan umrah buat pertama kalinya pada usianya 58 tahun kini.

"Sebagai seorang yang kurang penglihatan, terdapat beberapa cabaran saya hadapi ketika buat umrah. Di antaranya adalah jalan di sana

yang tidak rata menjadikan saya agak sukar untuk melangkah. Tangga yang tidak mempunyai warna menjadikan saya sukar untuk mendakinya walaupun dengan bantuan tongkat saya. Cabaran terbesar adalah menghadapi orang yang ramai bersama ingin solat di masjid. Namun itu tidak menghambat saya daripada melakukan ibadah yang terbaik untuk umrah ini."

"Cabaran semasa tawaf. Sesak dan ramai hinggan saya ditolak tetapi saya hadapi dengan tabah sehingga alhamdulillah dapat menyelesaikan tawaf. Ini ditambah dengan perasaan gementar berada di kawasan sesak seperti di Raudhah," kongsi Cik Fadhiah.

LEBIH BANYAK PERANCANGAN BAGI PENUHI KEPERLUAN JEMAAH KURANG UPAYA

Kejayaan ini hasil perancangan awal yang dilakukan sejak Oktober lalu antara **BYSD** dan POS TKI Travel.

"Kami mempersiapkan kemudahan yang mesra-OKU seperti van khas dan kumpulan khusus dalam menangani keperluan mereka. Selain itu, kami juga bekerjasama erat dengan pegawai **BYSD** untuk memastikan semua keperluan jemaah dapat dipenuhi. **BYSD** juga menempatkan relawan yang penuh perhatian bagi setiap jemaah umrah yang ikut serta.

"Tanpa para relawan ini, ibadah umrah bagi jemaah OKU itu tidak mungkin terlaksana. Kami sangat menghargai dedikasi mereka. Kami harus berdamping dengan mereka pada setiap waktu seperti solat, makan dan juga berbelanja.

"Pengalaman membawa jemaah yang terjejas penglihatan untuk bertawaf amat mencabar pada tempoh umrah di bulan Rejab itu kerana keadaan amat sesak. Namun syukur Alhamdulillah, kami dapat tangani dengan tenang. Kami juga perlu mempelajari sikap golongan istimewa itu yang agak sensitif dan perlu tenang mereka apabila

mereka 'emosional'. Di Tanah Suci, ada di kalangan mereka yang sakit dan perlukan perhatian tambahan dan kami membantu dengan memberi ubat serta melakukan apa yang perlu untuk memberi mereka kelegaan," kongsi Pengurus Besar POS TKI Travel, Roziana Ibrahim.

Selain sokongan tersebut, perancangan bagi pengangkutan dan hotel juga dititikberatkan untuk memberi keselesaan bagi jemaah lebih-lagi yang berkerusi roda.

"Penyediaan pengangkutan mengambil bagasi dan jemaah dari rumah ke lapangan terbang untuk memastikan perjalanan mereka bermula dengan selesa tanpa perlu risau tentang kenderaan. Penyediaan pengangkutan mudah akses untuk pengguna kerusi roda melibatkan usaha memastikan bas atau van mempunyai ruangan khas untuk meletakkan kerusi roda. Penginapan di lokasi yang berhampiran dengan masjid adalah utama untuk mengurangkan jarak berjalan kaki. Hotel juga mesti mempunyai kemudahan seperti lif yang luas dan bilik mandi mesra OKU.

"Jadual perjalanan pula perlu dirancang dengan mengambil kira masa rehat tambahan untuk peserta OKU, yang mungkin lebih cepat penat atau memerlukan lebih banyak masa untuk bergerak. Ruang juga perlu disediakan untuk keperluan perubatan dan membawa peralatan perubatan khas seperti 'inhaler'. Doktor online telah dikenalkan sebelum perjalanan," jelas Penolong Pentadbiran **BYSD**, Siti Nur Qurratu'ain Mohamad Noh.

Perjalanan umrah dari 13 hingga 24 Januari itu ditaja sepenuhnya oleh para penderma **BYSD** termasuk dermawan individu dan peniaga tempatan.

Sumber : BERITA Mediacorp/im